

## Naqqiut

### Siunnersuut 18. august 2014-minngaaneersoq taarserpaa

**(Oqaaseqatigiit annertunngitsunik iluarsaanneqarput, taavalu aamma pisortatigoortunik ilu-saanut iluarsaasoqarpoq.)**

**Uunga siunnersuut: Aalisarnermut aningaasaliissutitut immikkoortitat pillugit Inatsisartut inatsisaata allangortinneqarnera pillugu Inatsisartut inatsisaat nr. x, xxx 2014-imeersoq**

(Pisassiissutit akuersissutillu allangortinneqannginnissaat, aamalu siaterinissamut tunngatillugu angallatip nalinga pisiusortumik nalilerneqarnissaa il. il.)

### § 1

Aalisarnermut aningaasaliissutitut immikkoortitat pillugit Inatsisartut inatsisaanni nr. 15, 20. november 2006-imeersumi, Inatsisartut inatsisaatigut nr. 13, 2. december 2009-imi aammalu Inatsisartut inatsisaatigut nr. 22, 22. november 2011-imi allangortinneqartumi kingullermillu Inatsisartut inatsisaatigut nr. 8, 3. december 2012-imi allangortinneqartumi, makkua allanguuteqartinneqarput:

**1. § 1, imm. 1, imatut allassimassaaq:**

”§ 1. Inatsisartut inatsisaanni siunertaavoq aalisarnermik inuussutissarsiutip siuarsaaviginissaanut tapiissuteqartarnissaq, tassunga ilanngullugit ingerlatserusuttunut nutaanut piuminarne-rusumik periarfissiisoqarnissaa kiisalu aalisariutit nutarteriffigineqarnissaannut tapersiisarnis-saq.”

**2. § 14. imatut allassimassaaq:**

”§ 14. Naalakkersuisut siunertarineqartumut aningaasanut inatsimmi ukiumut pineqartumut aningaasani killiliussaasuni sinerissamut qanittumi aalisariutinik isaterinissamut aningaasanik tapiissuteqarsinnaapput.

*Imm. 2. Tapiissuteqartoqarsinnaavoq, angallat*

1) aalisariutinik nalunaarsuiffimmi nalunaarsorsimappat imaluunniit Angallatinik nalunaarsuiffimmiippat aammalu Aalisarnermut, Piniarnermut Nunalerinermullu Naalakkersuisoqarfiup angallatinut aalisarnermik inuussutissarsiornermut akuersissutilinnut nalunaarsuiffiani nalunaarsorsimappat,

2) angallatip allagartaa malillugu angissusaa 5 BRT/ 8 BT qaangersimappagu taamaattorli 75 BRT/120 BT ataallugu angissuseqarpat,

- 3) ukiunik 25-nik pisoqaassuseqarpat pisoqaanerullunuunniit, aammalu
- 4) ukiut marluk kingulliit nunatsinni aalisarnermi aalisaqataasarsimappat.

*Imm. 3.* Angallammut pisortat atukkiussaqaarsimassagaluarpata tapiissuteqaarsimassagaluar-patalu, imm. 1 naapertorlugu tapiissutit aatsaat kingullermik pisortat taarsigassarsisitsinerisa tapiissuteqaarsimanerisalu kingorna ukiut qulit qaangiuppata tunniunneqarsinnaapput.

*Imm. 4.* Qinnuteqaatip piffissami qanoq ilisukkulluunniit tunniunneqarnissaa apeqqutaatin-nagu isaterinissamullu tapiiffiqineqarnissamut piunasaqaataasut qinnuteqaateqartut tamarmi-usut eqquutsissimagaluarpatigilluunniit, § 17, imm. 1-imi ataatsimiititaliaq taaneqartoq erseqqissumik naliliineq aallaavigalugu qinnuteqaateqartut salliutinniarneqarsinnaapput qaqugumulluunniit tapiissuteqarnissamut aningaasat tunniunneqarsinnaasut isaterinissamullu pissusissamisooritsisoqarnissaa tapiissutinillu tunniussisoqarnissaa eqqarsaatigalugit.

*Imm. 5.* Imm. 4-mi pingaarnersiuneq taaneqartoq piunasaqaatit tulluuttuni taaneqartut tunngavigalugit pissaaq:

- 1) Angallatip pisoqaassusaa usigisinnaasaalu,
- 2) angallatip pisai,
- 3) nunap immikkoortuata ilaani angallatit akuersissutilluunniit qassiuneri, aammalu
- 4) qinnuteqartup angallammik piginnittuunerata sivisussusaa.”

**3. § 15.** imatut allassimassaaq:

”§ 15. Tapiissutit annertussusissaat Naalakkersuisut tunngavissatut aalajangersagaat aallaavi-galugit angallatillu angissusaaq BRT imaluunniit BT aallaavigalugit naatsorsorneqassapput. Angallat ukiunit 25-inik pisoqaaneruppat tapiissutigineqartartut angallatip pisoqaliartornera malillugu ukiumut 5%-imik appartinneqartassapput. Angallatit ukiunik 35-inik pisoqaas-suseqaleraangata nalikillileeqqittoqarneq ajorpoq.

*Imm. 2.* Isaterinissamut tapiissutit annerpaamik angallatip nalingata 100 %-ianik annertus-suseqarsinnaapput.

*Imm. 3.* Angallatip nalinga nalilersuisartumit arlaallaannulluunniit attuumassuteqan-ngitsumit Aalisarnermut, Piniarnermut Nunalerinermullu Naalakkersuisoqarfimmit toqqarneqartumit aalajangersarneqassaaq. Nalilersuisitsinermi aningaasartuutit qinnuteqartup akilissavai.

*Imm. 4.* Angallammik isaterinissamut qinnuteqarnissaa ukiumik ataatsimik sioqqullugu an-gallatip motorilluunniit ajoqusersimaneq pissutigalugu sillimasiisarfimmiit akiliutigi-neqartut, angallammik iluarsaassinermit sillimasiisarfiup akiliutai atorneqarsimanngippata tapiissuteqarnermi taakkua ilanngaatigitinneqassapput. Aammattaaq sillimasiissutit qin-nuteqarnerup kingorna ajutoorneq pissutigalugu sulili tapiissutit tunniunneqanngitsut akili-utigineqartut, ilanngaatigitinneqassapput.”

**4. § 16.** imatut allassimassaaq:

”§ 16. Isaterinissamut tapiissutit tunniunneqartinnagit angallat isatereersimassaaq.

*Imm. 2.* Isaterineq isaterivissatut Aalisarnermut, Piniarnermut Nunalerinermullu Naalakker-suisoqarfimmit akuerisaasumit ingerlanneqassaaq.

*Imm. 3.* Tapiissutit tunniunneqartinnagit angallatip aalisariutininik nalunaarsuiffimmit imaluunniit Angallatinik nalunaarsuiffimmi aammalu Aalisarnermut, Piniarnermut Nunalerinermullu Naalackersuisoqarfiup angallatinut aalisarnermik inuussutissarsiornermut akuersisutilinnut nalunaarsuiffiani nalunaarsorsimanera peerneqassaaq.”

## § 2

Inatsisartut inatsisaat ulloq 1. januar 2015 atuutilerpoq.

*Namminersorlutik Oqartussat, ulloq xx.xx 2014*

Aleqa Hammond